

दिनांक 08.02.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- दिल्ली विधानसभा चुनाव मांय भारतीय जनता पार्टी री जोरदार जीत -27 साल पाछे सरकार बणावण री ओर बढ़ रही है।
- मुख्यमंत्री भजनलाल शर्मा मंत्रीमण्डल रा सदस्यां अर भाजपा रा विधायकां सागे प्रयागराज महाकुंभ मांय आज पवित्र स्नान कीनो— राजस्थान मण्डपम मांय मीटिंग ई कीनी।
- केन्द्रीय कौशल विकास अर उद्यमिता राज्य मंत्री जयन्त चौधरी कह्यो—नागौर मांय खाद्य प्रसंस्करण हलका मांय घणी संभावनावां।
- सोम, माही अर जाखम नदियां रा संगम री ठोड़ आज बेणेश्वर मेळो सरू व्ह्यो।

000

दिल्ली विधानसभा चुनाव मांय भारतीय जनता पार्टी जीत गयी है। 70 सीटां री विधानसभा मांय भाजपा दो तिहाई सीटां माथे जीत हासिल कीनी, जदके हाल तांई राज करण वाळी आम आदमी पार्टी—आप हाल तांई 13 सीटां जीत सकी है। दूजी कानी दिल्ली विधानसभा चुनाव मांय कांग्रेस पार्टी ने कोई सीट नी मिली। चुनाव मांय आम आदमी पार्टी रा दो मोटा उम्मीदवार पैली वाळा मुख्यमंत्री अरविन्द केजरीवाल अर पैली वाळा उप मुख्यमंत्री मनीष सिसोदिया हार गया, जद के निवर्तमान मुख्यमंत्री आतिशी भारतीय जनता पार्टी रा उम्मीदवार रमेश बिधूड़ी ने मात दे र जीत हासिल कीनी। प्रधानमंत्री नरेन्द्र मोदी दिल्ली विधानसभा चुनाव मांय भाजपा री जीत ने ऐतिहासिक बताता थकां सोशल मीडिया रे ज़रिए वां रा संदेश मांय कह्यो के जनता री ताकत सब ऊं ऊंची है अर आ सुशासन री जीत है। केन्द्रीय गृह मंत्री अमित शाह कह्यो के दिल्ली वाळा बता दीनो के जनता ने झूठा वायदां ऊं नी बरगलायी जा सके है। वे दिल्ली मांय भाजपा री जोरदार जीत परां पार्टी रा कार्यकर्तावां ने बधाई दीनी। रक्षा मंत्री राजनाथ सिंह कह्यो के लोग प्रधानमंत्री रा भरोसा अर सुशासन री सियासत मांय भरोसो जतायो है। मुख्यमंत्री भजनलाल शर्मा दिल्ली विधानसभा चुनाव रा नतीजां ने केंद्र सरकार री जनता रा भला री नीतियां माथे जनता रा भरोसा री छाप बताया।

.....

दिल्ली विधानसभा चुनाव मांय भाजपा री जीत रो जश्न प्रदेश मांय ई मणायो जा रह्यो है। अजमेर, पाली, करौली अर भीलवाड़ा समेत केई ठौड़ां भाजपा रा कार्यकर्ता आतिशबाजी कर र अर मिठाई बांट र खुशी जतायी।

000

केन्द्रीय कौशल विकास अर उद्यमिता मंत्री जयन्त चौधरी आज नागौर ज़िला रा मूण्डवा मांय टाबरियां री भणार्ई—लिखाई ऊं जुड़या एक गैर—सरकारी संस्थान मांय राखी ज्या जळसा मांय सिरकत कीनी। वे कह्यो के मारवाड़ मांय जनता री मदद ऊं भणार्ई—लिखाई रा हलका मांय चोखो काम व्हे रह्यो है।

श्री चौधरी नागौरी पान-मेथी रो जिक करता थकां कह्यो के नागौर मांय खादय प्रसंस्करण रा हलका मांय घणी संभावनावां है। राज्यपाल हरिभाऊ बागडे ई कार्यक्रम मांय सिरकत कीनी अर संस्थान मांय बणायी ज्या नुवा छात्रावास अर सभागार जनता ने सूंप्या। राज्यपाल आज सलूबर ज़िला रा चावंड मांय राख्यी ज्या कार्यक्रम मांय ई सिरकत कीनी। श्री बागडे महाराणा प्रताप रे देवलोक व्हेवण री ठौड़ माथे वां री 428 वीं बरसी रे मौके राख्यी ज्या कार्यक्रम मांय सिरकत कीनी। ई मौके वे वीर शिरोमणि महाराणा प्रताप री हिम्मत, त्याग अर बलिदान ने याद कीना। भारत दर्शन यात्रा सारु आया विद्यार्थियां रो एक दल आज जयपुर रा राजभवन मांय राज्यपाल हरिभाऊ बागडे ऊं मुलाकात कीनी। ई दौरान राज्यपाल 'एक भारत श्रेष्ठ भारत' री सोच रा तैत ऐड़ी यात्रावां ने खास बताया। राज्यपाल सागे बातचीत रे दौरान दल रा सदस्य भारत दर्शन यात्रा रा अनुभव बताया। सीमा सुरक्षा बल-बी.एस.एफ. री ओर ऊं राख्यी जा रही ई यात्रा मांय शामिल 35 विद्यार्थियां रो दल जम्मू तवी ऊं जयपुर आयो है।

000

केन्द्रीय आयुष राज्यमंत्री प्रतापराव जाधव कह्यो है के आयुर्वेद परदेसां मांय ई तेज़ी ऊं लोकप्रिय व्हे रह्यो है। वे आज जयपुर मांय राष्ट्रीय आयुर्वेद संस्थान रा 50 वां स्थापना दिवस रा जळसा मांय बोल रह्या हा। जाधव कह्यो के आयुर्वेद ने और बधावो देवण री लगातार कोशिशों करी जा रही है। आयुष राज्यमंत्री एन.आई.ए. रा नुवा कामां री सराहवणा करता थकां कह्यो के ई संस्थान मांय बेहतर तकनीक अर सुबीतां सागे मरीजां रो ईलाज कर्यो जा रह्यो है। वे आयुर्वेद रा हलका मांय शोध ने बधावो देवण री संस्थान री कोशिशों ने खास बतायी।

000

अर अब समाचार महाकुंभ ऊं -

मुख्यमंत्री भजनलाल शर्मा आज प्रयागराज महाकुंभ मांय संगम री ठौड़ पवित्र स्नान कीनो। श्री शर्मा आज संवारे मंत्री मण्डल अर भारतीय जनता पार्टी रा विधायकां सागे प्रयागराज पूर्या। वे गंगा, जमुना अर सरस्वती नदियां री तौर-तरीका ऊं पूजा-अर्चना कर र प्रदेश री जनता रा सुख, समृद्धि अर कल्याण री प्रार्थना कीनी। श्री शर्मा राजस्थान मण्डपम् मांय मंत्रीपरिषद री मीटिंग लीनी। खबरनवीसां सागे बातचीत करता थकां मुख्यमंत्री महाकुंभ ने आध्यात्मिकता अर इंसानियत रो महोत्सव बतायो। वे गंगा नदी ने जीवन देवण वाली बतायी।

महाकुंभ मांय हाल ताई 41 करोड़ ऊं बत्ता जातरु पवित्र स्नान कर लीनो है अर मोटी तादाद मांय जातरु पूग रह्या है। 13 जनवरी ऊं सरु व्ह्यो महाकुंभ 26 फरवरी ताई चालेला।

000

अलवर मांय सांसद खेल उत्सव राख्यो जा रह्यो है। ई रा तैत इन्दिरा गांधी स्टेडियम मांय केई होड़ां राख्यी ज्यी। अलवर रा सांसद अर केन्द्रीय मंत्री भूपेन्द्र यादव ई दौरान खिलाड़ियां रो उमाव बधायो। खबरनवीसां सागे बातचीत करता थकां श्री यादव कह्यो के खुद सेवक समूहां ऊं जुड़ी महिलावां ने बधावो देवण सारु वां ने ई ई आयोजन ऊं जोड़ी ज्यी।

000

उत्तराखण्ड मांय चाल रह्या 38 वां राष्ट्रीय खेलां मांय राजस्थान हाल ताई 29 तमगा हासिल कीना है। आं मांय सोना रा 7, चांदी रा 6 अर कांसा रा 16 तमगा शामिल है। आज रुद्रपुर मांय राजस्थान री टीम हैण्डबॉल री होड़ मांय उतर रही है। इण ऊं पैली काल व्ह्या मुक्केबाज़ी रा मुकाबलां मांय राजस्थान चांदी अर कांसा रा तमगा जीत्या। राष्ट्रीय खेलां मांय राजस्थान सारु

सोना रा 4 तमगां समेत 11 तमगा जीतण वाळा वुशु खिलाडियां रो काल राजस्थान राज्य कीड़ा परिषद रा अध्यक्ष डॉक्टर नीरज के. पवन जयपुर रा सवाई मान सिंह स्टेडियम मांय मान कीनो।

0000

आदिवासियां रो महाकुंभ कह्यो जावण वाळो बेणेश्वर मेळो आज सरु व्हयो। ओ मेळो डूंगरपुर जिला रा सोम माही अर जाखम नदियां रा संगम री ठौड़ बेणेश्वर धाम मांय भरे है। मेळा मांय मोटी तादाद मांय जातरु पूग रह्या है। म्हाणा डूंगरपुर खबरनवीस बतायो के ढोल-नगाड़ां री धूम बीचे धाम माथे सतरंगी ध्वजा फहरा र मेळा री सरुआत करी ज्यी।

दूजी कानी जैसलमेर मांय काल मरु महोत्सव सरु व्हेला। 12 फरवरी तांई चालण वाळा ई उत्सव मांय देसी-परदेसी सैलानियां अर स्थानीय जनता सारु सांस्कृतिक कार्यक्रम अर रोचक होड़ां राख्यी जावेला। महोत्सव री सरुआत काल शोभा यात्रा सागे व्हेला।

000

दुनिया मांय राजस्थान री संस्कृति अर रीति-रिवाज सारु खास ओळखाण है। राज्य री इन्द्रधनुषी संस्कृति अठे रा पेहराव मांय ई निजर आवे है। महिलावां रो पेहराव कुर्ती, घाघरो अर चुनरी अब देस-परदेस मांय घणो पसंद कर्यो जावण लाग्यो है। पेश है एक रपट—

000